

Statutas dall'Uniun da catschadurs Badus



Tujetsch, ils 18 da schaner 2014

Statutas dall'Uniun da catschadurs Badus

I. Num e domicil

Art. 1 Num e domicil:

Sut il num Uniun da catschadurs Badus exista tenor cudisch civil svizzer art. 60 ff in' uniun da catschadurs dalla vischnaunca da Tujetsch, ina secziun dalla Uniun cantunala grischuna da catschadurs da patenta (BKPJV). Ella ei vegnida fundada ils 19 da mars 1943. La sedia dalla uniun ei Sedrun. Il plaid commembers vala mintgamai per la schlatta feminina sco era masculina.

II. Intent e finamira

Art. 2 Intent e finamira:

L' Uniun da catschadurs Badus ha la finamira da formar ses commembers e promover in bien spért cun tgirar gl'interess dils catschadurs;

entras mantener la basa per ina biala e sauna catscha da patenta en nies cantun;

entras ina buna tgira e bien quitau per ils animals selvadis, en special cun defender e promover igl ambient dil spazi vital per nossas selvaschinas;

entras esser commember dall'Uniun da catschadurs cantunala da patenta sco era commember dil district 1 dil BKPJV cun renconuscher lezzas statutas e lezs reglements;

entras perseguitar e sedar giu spirontamein cun fatgs da catscha, colaborar vid midadas da leschas e regulativs da catscha ed autras leschas che pertucan flora e fauna.

III Commembers, dretqs ed bligaziuns

Art. 3 Appartenenza e representanza

All'Uniun da catschadurs Badus appartegnan en principi catschadurs cun domicil ella vischnaunca da Tujetsch.

Catschadurs senza domicil ella vischnaunca da Tujetsch san denton era daventar commembers.

L'Uniun da catschadurs Badus secumpona da:

- commembers A (acitvs)
- commembers B (simpatisonts)
- commembers passivs ni donaturs
- candidats

Art. 4 Commembers A

Commember A sa mo quel daventar che posseda las premissas per il dretg dad ir a catscha el cantun Grischun ed ei aunc buca commember A en in'otra uniun da catschadurs dall'uniun cantunala, sco era survegladers da catscha. Els ein medemamein commembers dall'uniun cantunala.

Mintga commember activ ha il dretg da:

- far propostas
- votar
- vegnir elegius
- seprofitar d'acziuns dall'uniun cantunala
- separticipar a scadina occurenza organisada dall'Uniun da catschadurs Badus
- far diever dils indrezs dall'Uniun da catschadurs Badus

Mintga commember activ ei obligaus da:

- assister alla radunonza generala
- vegnir suenter allas obligaziuns finanzialas dall'Uniun da catschadurs Badus
- segidar tenor meglier saver e puder en tuttas spartas organisatoricas
- segidar tenor basegns vid la tgira da biotop
- separticipar alla catscha comunabla

Art. 5 Commembers B

Commember B sa mintga commember A d'ina outra uniun dall'uniun cantunala daventar.

Mintga commember B ha ils medems dretqs e las medemas obligaziuns sco il commember A. En funcziun dil BKPJV han els buca il dretg da votar e da vegnir elegi.

Art. 6 Commembers passivs ni donaturs

Commember passiv sa mintga persuna daventar, sto denton pagar sez la gassetta da catschadurs grischuns. En funcziun dil BKPJV han els buca il dretg da votar e da vegnir elegi, ston denton era buca pagar la contribuziun alla uniun cantunala.

Commembers passivs han il dretg da:

- assister allas radunonzas senza dretg da votar
- separticipar a tuttas occurenzas dall'Uniun da catschadurs Badus
- segidar vid la tgira da biotop, sco era vid autras spartas organisatoricas dall'Uniun da catschadurs Badus

Mintga commember passiv ei obligaus da:

- pagar la contribuziun annuala
- sustener e star en per ils dretgs dils catschadurs

Donatur sa mintga persuna ni interpresa daventar. Il donatur sa vegnir envidaus tier occasiuns specialas. Ils donaturs han negins dretgs ni obligaziuns enviers l'Uniun da catschadurs Badus.

Art. 7 Candidats

Persunas ch'ein sedecididas da far igl examen da catscha daventan candidat cun ils dretgs dils commembers B tenor art. 5 dallas statutas, denton senza dretg da votar. La secziun paga per candidats negina contribuziun alla uniun cantunala. La suprastanza ha il dretg da conceder a quella persuna il status da candidat entochen ch'ella ha terminau igl examen da catscha cun success.

La damonda da recepziun sco candidat dall'Uniun da catschadurs Badus ei da drizzar en scret al president cun indicar las personalias. Quella damonda vala era per daventar commember A dall'Uniun da catschadurs Badus suenter haver terminau igl examen da catscha cun success.

Art. 8 Recepziun da commembers

La damonda da daventar commember dall'Uniun da catschadurs Badus ei da drizzar en scret al president cun indicar las personalias. Sur il recepir ni renviar commembers decida la radunonza generala entras scrutini ni maunpli. Sco commember ei quel recepius che contonscha il surpli dallas vuschs dils commembers A

presents. A mintga commember vegn tier la recepziun surdau in exemplar da quellas statutas. Ina eventuala taxa d'intrada vegn fixada dalla radunonza generala.

Sin proposta dalla suprastanza sa quella taxa vegnir midada a caschun d'ina radunonza generala cun 2/3 dallas vuschs dils commembers A presents. Entradas da novs commembers ston vegnir registradas el cudisch da protocols cun num, prenum ed onn da naschientscha.

Encunter in'eventuala refusada d'ina recepziun sa tal far recuors a scret tier la suprastanza centrala gronda dall'uniun cantunala grischuna da catschadurs e quei enteifer 30 dis. La suprastanza centrala gronda decida definitivamein.

Art. 9 Extrada da commembers

In'extrada ord l'Uniun da catschadurs Badus ei da drizzar a scret al president sil pli tard 5 dis avon la radunonza generala. Commembers dalla suprastanza ni funcziunaris han d'inoltrar lur abdicaziun a scret al president sil pli tard 4 jamnas avon la radunonza generala.

Cun l'extrada sco commember piarda quel tuts dretgs visavi l'Uniun da catschadurs Badus, sco era vid lezza facultad. Per igl onn da fatschenta eis el denton aunc obligaus finanziamein visavi l'Uniun da catschadurs Badus.

Art. 10 Exclusiun da commembers

Commembers che cunterfan als interess dall'Uniun da catschadurs Badus ni sesutamentan buca a lezzas ordinaziuns, san tras ina radunonza generala cun scrutini e 2/3 dallas vuschs dils commembers A presents vegnir exclud sco commember da tala;

Ei in commember en retard cun pagaments visavi l'Uniun da catschadurs Badus e paga malgrad admoniziun a scret buca las contribuziuns sil termin fixau, vegn el automaticamein sclus sco commember.

Commembers A che assistan buca alla radunonza generala senza ina valeivla perstgisa ni che sefutan da lur posts da lavur, san tras la radunonza generala vegnir sclus sco commember entras 2/3 dallas vuschs dils commembers A.

Cun l'exclusiun d'in commember piarda quel tuts dretgs e regress visavi l'Uniun da catschadurs Badus e sia facultad.

Encunter in'exclusiun sa il pertuccau recuorer a scret enteifer 30 dis tier la suprastanza centrala gronda dall'Uniun da catschadurs cantunala. Quella decida definitivamein.

IV. Undrientschas a commembers

Art. 11 Commembers d'honor

Commember d'honor sa ina persuna ch'ei sefatga grondiusamein (extraordinariamein) meriteivla per l'Uniun da catschadurs Badus vegnir numnada entras la radunonza generala. Leutier drova ei 2/3 dallas vuschs dils commembers A presents. La nominaziun sco commember d'honor vegn fatga alla radunonza generala sin proposta dalla suprastanza.

Ils commembers d'honor gaudan vinavon ils dretgs tenor art. 4 alinea 2, ein denton libers da tuttas taxas ed obligaziuns visavi l'Uniun da catschadurs Badus. Els dueien vegnir undrai entras la surdada d'in present.

Art. 12 Commembers veterans e commembers libers

a) commembers veterans

Veterans vegnan quels commembers, che appartegnan silmeins 25 onns nuninterruttamein all'uniun cantunala, ein stai enzacu a catscha e cumpleneschan egl onn current il 60 avel onn. Els obtegnan la medaglia da veteran dall'uniun cantunala, ein denton buca libers dallas contribuziuns.

b) commembers libers

Commembers libers daventan tals, che cumpleneschan egl onn current il 75 avel onn, ein stai enzacu a catscha ed ein silmeins 25 onns nuninterruttamein commember dall'uniun cantunala. Els ein libers dallas contribuziuns statutaricas, possedan denton tuts dretgs sco commember ed obtegnan la medaglia da veteran, sch'els ein buca gia en possess da quella.

Art. 13 Undrientschas da commembers

Per commembers ch'ei sefatgs grondamein meriteivels visavi l'uniun cantunala sa l'Uniun da catschadurs Badus far la proposta tier l'Uniun da catschadurs cantunala per las suandontas undrientschas:

- a) Distincziun da meret (Verdienstauszeichnung)
- b) Distincziun da tgira (Hegeauszeichnung)
- c) Commember honorari cantunal
- d) Veteran cantunal
- e) Commember liber cantunal

V. Organisaziun

Art. 14 Organisaziun

Ils organs dall'Uniun da catschadurs Badus ein:

- a) La radunonza generala
- b) Radunonzas extraordinarias
- c) La suprastanza
- d) Ils revisurs da quen

Art. 15 La radunonza generala

La radunonza generala ha liug mintg'onn sil pli tard treis meis suenter la fin digl onn da quen. Igl onn da quen cuozza naven dils 1 da schaner entochen ils 31 da december.

L'invitaziun alla radunonza inclus la gliesta da tractandas ein da tarmetter al commember silmeins 15 dis avon la radunonza. In cuort preavis duei vegnir publicaus avon la radunonza el fegl official da Tujetsch.

Tractandas dalla radunonza generala ein:

1. Appel ed elecziun da dus dumbravuschs
2. Approbaziun dalla gliesta da tractandas
3. Prelecziun ed approbaziun dil protocol
4. Rapport annual dil president
5. Rapport annual dil cau da tgira
6. Rendaquen, rapport dils revisurs quen da tgira
7. Rendaquen, rapport dils revisurs ed approbaziun dil quen annual
8. Mutaziuns da commembers

9. Fixaziun dallas contribuziuns tenor il reglament vertent
10. Las elecziuns dalla suprastanza succedan alternond, quei vul dir:
Els onns dusps vegn elegiu:
 - a) il president
 - b) il cassier
 - c) il cau da tgira
 - d) in dils dus revisurs da quen
 Els onns grads vegn elegiu:
 - e) igl actuar e vicepresident
 - f) igl administratur da material
 - g) in dils dus revisurs da quen

Ein duront ina perioda d'uffeci singuls posts daventai vacants, vegnan tals remplazzai la proxima radunonza e valan per il rest da quella perioda.

Scadin commember dalla suprastanza ei reelegibels. Commembers che han aunc buca funcziunau en suprastanza, ein obligai da surprender in uffeci. Excepi da quei ein commembers d'honor, veterans e commembers libers.

11. Elecziuns per ina perioda d'uffeci dad in onn dils delegai e substituents tenor
12. art. 15 A) dallas statutas dall'uniun cantunala
13. Propostas alla radunonza da delegai dil district 1 e dall'uniun cantunala
14. Undrientschas tenor art. 11 - 13 dallas statutas
15. Program da lavur
16. Varia

La radunonza generala ei autorisada da prender conclus sin propostas da commembers mo, sche quellas ein vegnidadas surdadas en scret alla suprastanza per ponderaziun e quei silmeins diesch dis avon la radunonza generala.

Sur da propostas che figureschan buca sin la gliesta da tractandas ed ein buca vegni inoltradas diesch dis avon en scret sa la radunonza prender decisiun mo sche 2/3 dils commembers A presents ein persuerter.

Las votaziuns vegnan fatgas cun maunpli. Sin giavisch d'in commember A ston quellas vegnir fatgas cun scrutini. Tier las elecziuns decida l'emprema ga igl absolut pli, la secunda ga il relativ pli. Commembers da suprastanza che han buca abdicau valan automaticamein sco proponi.

Tuttas ulteriuras votaziuns succedan cun maun pli. En cass d'ulividad decida il president.

Art. 16 La radunonza extraordinaria

La radunonza extraordinaria vegn convocada entras la suprastanza en cass urgents. La suprastanza ei obligada da convocar ina radunonza extraordinaria sche 1/3 dils commembers A pretendan ina tala. La radunonza extraordinaria ha las medemas competenzas sco la radunonza generala. L'invitaziun ha da succeder sco tier la radunonza generala.

Art. 17 La suprastanza

Alla suprastanza appartegnan:

- il president
- igl actuar e vicepresident
- il cassier
- igl administratur da material
- il cau da tgira

La suprastanza diregia tuttas fatschentas administrativas/organisatoricas dall'Uniun da catschadurs Badus ed ei cumpetenta da decider sche silmeins 3 commembers ein presents. Il president sco era il cau da tgira representan la secziun tier las radunonzas dil district 1 dil BKPJV.

La suprastanza ei deliberada dalla contribuziun annuala.

Ilis pensums dalla suprastanza

Art. 18 President

Il president convochescha e presidescha las radunonzas dalla suprastanza e dall'Uniun da catschadurs Badus. El procura ch'ils conclus pri dalla radunonza vegnan exequi. El survigilescha gl'entir menaschi dall'Uniun da catschadurs Badus e representa quella, defendend ilis interess dils catschadurs en tuttas situaziuns che sepresentan. El ei responsabels per tuts cudischs vegls da protocols e da cassa, sco era per tuttas correspondenzas da muntada.

Art. 19 Actuar

Igl actuar scriva ils protocols da tuttas radunonzas dall'Uniun da catschadurs Badus e dallas sesidas dalla suprastanza. El remplazza il president.

Art. 20 Cassier

Il cassier procura il traffic da cassa ed administrescha la facultad dall'Uniun da catschadurs Badus. El fa igl incasso dallas contribuziuns. El tarmetta a temps la gliesta da commembers e fa giu quen cul cassier central. Plinavon meina el ina exacta gliesta da tuts commembers. Sil pli tard 10 dis avon la radunonza generala metta el a disposiziun il quen als revisurs.

Art. 21 Administratur da material

Igl administratur da material ei responsabels per in bien manteniment da tut ils stabiliments dall'Uniun da catschadurs Badus sco era dil material e meina ina gliesta d'inventari che sto vegnir actualisada annualmein.

Art. 22 Cau da tgira

Il cau da tgira ei responsabels per in cuntinuau menaschi da tgira da biotop conform allas prescripziuns da tgira cantunales e da noss'Uniun da catschadurs Badus. El procura per mauns dalla radunonza in rapport annual sur da sia incarica. En fatgs da tgira representa el l'Uniun da catschadurs Badus anoviars. La cassa da tgira ch'el meina e survigilescha, lai el reveder mintg'onn ils revisurs da quen, el presenta era tal alla radunonza generala. El ei responsabels per las starlieras e tut material cumpraus sur il quen da tgira ora. La gliesta d'inventari sto vegnir menada ed actualisada annualmein.

Art. 23 Revisurs da quen

Ils revisurs controlleschan il quen annual e dattan alla radunonza generala rapport a scret. Ils revisurs fan las propostas per l'approbaziun dils quens e per la scarica alla suprastanza.

VI. Finanzas

Art. 24 Finanzas

Las intradas dall'Uniun da catschadurs Badus consistan ord:

- a) Contribuziuns d'intrada
- b) Contribuziuns annualas
- c) Tscheins dalla facultad
- d) Surpli ord occurrenzas ed autras activitads
- e) Bunamanas buca previdas

Alla cassa vegn adossau:

- a) Expensas dall'administraziun
- b) Expensas per promover igl interess dall'Uniun da catschadurs Badus
- c) Expensas per il manteniment dil stan da sittar
- d) Contribuziuns all'Uniun da catschadurs cantunala
- e) Contribuziun all'uniun Gruppa da corns Badus
- f) Mussaments da condolientscha per commembers defuncts
- g) Expensas buca previdas

Per las obligaziuns dall'Uniun da catschadurs Badus ha sulettamein la facultad dall'uniun da star buna.

VII. Determinaziuns generalas

Art. 25 Suttascripziun

La suttascripziun giuridica per l'Uniun da catschadurs Badus han:

- a) En fatg d'administraziun: il president ensemen cun igl actuar
- b) En fatgs da finanzas: il president ensemen cun il cassier
- c) En fatgs da tgira: il president ensemen cun il cau da tgira

VIII. Determinaziuns finalas

Art. 26 Revisiun da statutas

Ina revisiun parziala ni totala da questas statutas ei resalvada alla radunonza generala. Quella ei autorisada da decider sche tala ei publicada sin gliesta da tractandas. Per midar statutas ni singuls artechels drova ei 2/3 dallas vuschs dils commembers A presents.

Art. 27 Soluziun


La soluziun dall'Uniun da catschadurs Badus sa succeder mo sch'il diember dils commembers activs sesminuescha sut 15 ed era lu mo sche 2/3 dils commembers restonts decidan da disolver l'Uniun da catschadurs Badus. Quei duei denton succeder mo sch'igl ei els proxims onns buca da quintar cun in carschament da commember

Tier ina soluziun dall'Uniun da catschadurs Badus va gl'entir menaschi da facultad da cassa e protocols vi alla suprastonza centrala dall'Uniun da catschadurs cantunala per administraziun en vesta dad ina eventuala nova secziun. Ils stabiliments da sittar dall'Uniun da catschadurs Badus van vi alla vischnaunca da Tujetsch.

Vegn enteifer 10 onns fundau negina secziun da catschadurs sil territori dalla vischnaunca da Tujetsch croda la facultad vi all'uniun cantunala .

Questas statutas ein vegnidas approbadas alla radunonza generala dall'Uniun da catschadurs Badus dils 18 da schaner 2014 ed approbadas entras la suprastonza centrala dall'Uniun da catschadurs cantunala dils xx da fevrer 2014.

Il president



Pius Degonda

igl actuar



Pieder Hendry

Genehmigt durch den Zentralverband des BKPJV am:

28. Febr. 2014

Der Präsident



Ernst Angerer

Der Aktuar



Hannes Ritzjan